

**Regional News Unit AIR Aizawl  
Monday, January 13, 2025  
Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- **Nikum 2024 chhung khan Dengue natna vangin mi 1 a thi a, mi 751-in he natna hi an vei tih hmuhchhuah a ni.**
- **Nikum, 2024 chhung khan Mizoram Police-te chuan cheng vaibelchhe 211 leh nuai 64 chuang hu ruihlo an man.**
- **Prime Minister Narendra Modia chuan reiloteah thalaite theihna sang tak avangin ram changkang dinhmun luah thuai a ni ang a ti.**
- **Khawvel huapa sakhaw thila inkhawmpui lian ber Mahakumbh chu vawiinah Prayagraj ah tan a ni.**

<><><>

**DENGUE**

**Nikum 2024 chhung khan Dengue natna vangin mi 1 a thi a, mi 751-in he natna hi an vei tih hmuhchhuah a ni.**

**Health & Family Welfare department a state vector borne disease control programme (SVBDCP) hotute hnen atanga thu dawn danin nikum chhung khan Dengue vei a rinhlelh leh mahni inringhlel mi 8,986 thisen endik a ni a. Chu'ng zinga mi 751 chuan he natna hi an kai tih hmuchhuah a ni a. Aizawl East-ah Dengue vei mi 209 leh Aizawl West-ah 319 hmuhchhuah a ni a, belkhawmin Aizawl district a Denuve vei hmuhchhuah hi mi 528 an ni a. Lunglei district-in dawtin 180 hmuhchhuah a ni a. Champhai-ah mi 17 hmuhchhuah a ni bawk a district dangah chuan mi 10 hnuai lam vek an ni.**

**Kum 2012 a Mizorama Dengue natna vei mi 6 hmuhchhuah a nih hnu khan mi 8-in nunna an chan pah tawh a. Kum 2022 khan mi 5 an thi a, kum 2023 khan mi 2 thi lehin nikumah 1 a thi leh a. Dengue vanga nunna chan zawng zawng hi Aizawl district ami vek an ni. Kum 2023 khan Mizoramah Dengue natna vei hmuhchhuah a tam ber a, mi 2,060-in an kai a, a hma kum, 2022 khan dawtin mi 1,868-in an vei tih hmuhchhuah a ni.**

<><><>

**VC, LC POLLS**

**Village council leh local council inthlan hun hi tunkar chhova puan a nih rin a nih lai-in vawiin hian an hun pawh tawi chungchang khinna chu High Court-in a ngaihtuah dawn ni-in an sawi.**

**State election commission hotute'n VC leh LC inthlan puan hun hi an la puangzar rih lo chungin court lam atanga khapna a awm lem loh chuan tun kar chho hian an puan a rinawm thu Akashvani Aizawl chuan a dawng a.**

Hetih lai hian All Mizoram village council association (AMVCA) president Pu K. Lalngaizuala chuan vawiin a Gauhati High Court Aizawl bench hawn ni hian sorkarin VC hun kal lai mek thla 6 lai a pawhtawisak a, February ni 19 a a titawp an khinna chu ngaihtuah a ni dawn niin a sawi a. He tianga sorkar an khinna tihtlai a nih chhan hi sawi fiahin Pu K. Lalngaizuala chuan a tirah LAD-in nikum November ni 20 a VC hun pawhtawina thupek a chhuah chu court-ah an khing phawt a. Mahse, titlangthang lovin November ni 21-ah sorkarin thupek a lo chhuah leh tih an hriat hnu-ah a hma a an khinna kha hnukdawkin a tharin petition an thehltut leh a, court chawhlin a nan zui avangin a khawtlai ta a ni a ti.

Tuna VC leh LC hun hi kumin August thla a tawp tur a nih lai-in sorkar chuan thla 6 zet pawhtawisakin February ni 19 thleng chauh an nihna an chelh theihna turin nikum November ni 20 khan thupek a chhuah a. Hei hi AMVCA chuan Gauhati High Court-ah a khing ta a ni. Local council hun pawh August thla a tawp tur a nih lain UD&PA department chuan nikum December ni 19 khan thupek chhuahin kumin February ni 19 thleng chauh turin a ti leh ta a.

Hetianga a nih tak avang hian state election commission chu VC leh LC inthlan buatsaih thei turin a inruahman chho ta a. Kar kal ta Nilaini khan state elction commission chuan district 9 a VC 544-te inthlanna tur electoral roll leh Aizawl Municipal Corporation huam chung leh Lunglei Municipal Council huam chhunga local council 111 thlanna atana electoral roll chu a tichhuak a nih kha. Inthlanna a mawhphurtu tur official thenkhat ruat an ni tawh bawk. Siaha leh Lawngtlai district a autonomous district council 3 huam chung tel lo, Mizoram pum a VC 544 awmah hian vote nei mi nuai 4, sing 3, sang 7 leh 708 an awm a. AMC a local council 87 inthlan atana vote nei hi mi nuai 2, sing 4, sang 4 leh 726 awmin LC 24 awmna LMC inthlanna atan vote nei 41,206 an awm a ni.



#### POLICE DRUG SEIZURE

Nikum, 2024 chung khan Mizoram Police-te chuan cheng vaibelchhe 211 leh nuai 64 chuang hu ruihhlo an man.

Police hotute'n Akashvani Aizawl an hrilh danin nikum chung khan heroin kg. 80 gram 856 an man a, an heroin man hi cheng vaibelchhe 24 leh nuai 25 chuang hu a chhut a ni a. Heroin tawlhruk, kawh leh hralh chungchangah hian Narcotic Drugs & Psychotropic Substances Act, 1985 hnuaiah thubuai 282 ziaklutin a inhnawih a puh mi 388 an man a ni. Nikum chung vek hian Police-te'n Crystal meth kg. 35 leh gram 155 an man a, cheng vaibelchhe 105 leh nuai 46 chuang hu a chhut a ni a. Hemi kaihnhawihah hian ND&PS Act hnuaiah bawh thubuai 4 ziaklutin mi 3 an man a, methamphetamine pawh kg. 627 leh gram 741, cheng vaibelchhe 81 leh nuai 61 chuang hu an man a. Methamphetamine kaihnhawihah hian mi 51 an man a, ND&PS Act hmangin thubuai 30 ziahluh a ni. Nikum chhunga ruihhlo kaihnhawih a ND&PS Act hmanga thubuai ziahluh zawng zawng hi 339 a ni a, mi man zawng zawng zat chu 468 a ni.

Hemi bakah hian caffeine kg. 1,075, cheng nuai 15 leh sing 6 hu an man a, Ganja kg. 305 leh gram 387, cheng nuai 15 chuang hret hu bakah damdawi pangngai, thalaite'n an hman sual nasat codeine telna khuh damdawi leh alprazolam cheng nuai khan chuang hu an man bawh.

Excise & narcotics department chuan nikum chung vek khan heroin kg. 46 leh gram 566 leh methamphetamine kg. 138 leh gram 817 an man ve bawk a. Mizorama ruihhlo dona dan kengkawhtu department 2-te'n nikuma an man belhkhawm hi heroin kg. 127 leh gram 455 leh methamphetamine kg. 766 leh gram 558 zet a tling a. Kum kalta a mante nena khaikhinin kumin hian an tam tam fal hle a ni.

Hetih lai hian nikum chung khan ruihhlo hmansual vangin Mizoramah mi 71 an thi a, thite hi mipa 60 leh hmeichhia 11 an ni.



#### MYANMAR STUDENTS

Mizoram lam, a bik takin Zokhawthar khaw sikul hrang hranga Myanmar zirlai sikul rawn kaite chuan khuahkhirhna karah tluang takin sikul an kal thei.

Kar kal ta Zirtawpni khan thlasik a chawl Mizorama sikul zawng zawng chu hawn a ni a. Assam Rifles hovin ramri a mihring inkalpawh chungchangah harsatna an siam thar avangin hemi sikul kai tan ni hian zirlaite'n ramri kan chungchangah harsatna an neih an hlauhthawnpui hle na-in harsatna awm lovin sikul an kai a, an ban hunah ramri an kan leh thei a ni. Zokhawthar khawtlang hruaitute'n Akashvani Aizawl an hrilh danin Myanmara Chin state, Mizoram depa khaw awm, Khawmawi, Rihkhawdar leh a chhehvel khua atanga Zokhawthar sikul hrang hranga sikul rawn kai hi mi 500 chuang an ni a. Primary school, middle school, high school leh higher secondary school zirlaite an ni. Zingah Mizoram lama sikul kai turin Tiau lui chungah lei dawh rawn kaltlangin sikul banah hemi lei hmang tho hian an khaw lamah an kir leh thin a ni.

Zokhawthar khawtlang hruaitute sawi danin January ni 1 atang khan Assam Rifles sipaite'n chung lam an hotute thu hmu ni a insawi-in ramri a inkalpawh chungchangah lehkha an siamsakte lo chu an chhuah duh lova. Champhai district mite chauh Myanmar lama luh phalna an pe ta bawk a. Hemi avang hian zirlai 500 chuang zet hian harsatna an tawh an hlau hle. Mahse, sikul kai tan ni hian engmah harsatna awm lovin an rawn lut a, an haw leh thei niin khawtlang hruaitute chuan an sawi a ni.

Nikum hmasa lama ramri hrul vela Myanmar sipaite leh sipai sorkarna duh lova dodaltu pawlte an inkah nasat avang leh indo thlawhnate'n he'ng lai kuate hi an rawn bomb reng avangin raltlan kir chho lehte pawhin an fate zirna a khaihlak loh na'n Mizoram lamah an fate sikul an kaltir hlawm a. Tunah hian academic session a la zawh loh avangin an la kaltir zawm ta zel a ni.



#### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.



## PM

Prime Minister Narendra Modia chuan reiloteah thalaite theihna sang tak avangin ram changkang dinhmun luah thuai a ni ang a ti. Nimina National Youth Day puala Viksit Bharat Young Leaders Dialogue 2025, Bharat Mandapam New Delhi-a a hmanpuinaah he thu hi sawiin Pu Modia chuan kum 25 lo awm tur chungin ram hmabak hi thalaiten an her danglam dawn a ti bawk.

National Youth Day hi kumtin Janaury ni 12-ah hman thin a ni a. Mithiam leh ropui Swami Vevekananda piancham puala hman thin a ni.



## MAHAKUMBH

Khawvel huapa sakhaw thila inkhawmpui lian ber Mahakumbh chu vawiinah Prayagraj ah tan a ni a. Sakhaw biakzina kal mi maktaduai chuante chu Ganga, Yamuna leh Saraswati te infinna Triveni Sangam-ah inchiah thianghlim turin an kalkhawm ang. He hunpui hi Febraury ni 26, Mahashivaratri thleng hman a ni dawn a. Niminah khan mi nuai 50 chuante Triveni Sangam ah hian an inchiah a ni. Mahakumbh hman anih dawn avangin sawrkar chuan venhimna khauh takin a kalpui a ni.



## CHHATISGARH

Chhatisgarh-a Bijapur District-ah Maoist hel mi panga security Force ten an kaphlum. Hel kahhlum zingah hian hmeichhia an pahnih an tel a. Security Force ten National Park leh a chhehvelah Maoist dapchhuah beihpui an thlak laiin inkahna hi a thleng a. Security Force te hian silai leh a mu thahnem tak an man tel bawk a ni .

